

Per trutgs e pitgognas dals 15-07-2011

Proposta dad Adalbert Caminada

Tura cun tschintg lais

Durada: 5 uras
Ensi: 750 m
Engiu: 1100 m

Ruta:

Ins banduna il chantun Grischun e va encunter Sargans - Wangs. Là prend'ins la pendiculara che port'ins fin tar la staziun da la Pizolhütte sin 2227 msm. Ussa cumenza la tura classica en il chantun da Son Gagl. Tschintg lais, ina fantastica tura, adina puspè novas surpraisas! L'emprim lai Wangsersee (2206 msm), il segund lai Wildsee (2438 msm), il terz lai Schottensee (2335 msm), il quart lai Schwarzsee (2372 msm) e per finir anc il Baschalvasee (2174 msm).

Il segund lai, suenter ca. in'ura, al pe dal glatscher dal Pizol è in bijou, ina perla. Qua sto ins far ina pausa in pau pli gronda ed admirar quella bellezza cuntrada. Lura traversar ina plaunca, adina sin bunas sendas, forsa ha igl anc restanzas da naiv. Tranter il Schottensee ed il Schwarzsee sin ca. 2490 msm, il pli aut punct da quella tura, va l'egliada fin encunter il lai da Constanza. Ina tavla d'infurmaziun fa attent ins sin ina gronda part da culms en la Svizra orientala. Da qua davent vesa ins er blers culms Grischuns. Ed ins vesa da qua er sin quatter pajais. In lieu fascinond! Vinavant engiu tar il tschintgavel lai, Baschalvasee e turnar enavos sin la staziun Gaffia sin 1861 msm. E puspè cun la pendiculara giu a Wangs.

Per quella tura offreschan las pendicularas da Wangs – Pizol era bigliets speziels cun entrada en la terma da Bad Ragaz, per tgi che vul finir ina bella tura cun far bogn e sin quella moda puspè vegnir tar forzas.

La sessiun da Wangs – Pizolhütte è dals 9 da fanadur fin ils 23 d'october. Scleriments pli detagliads sut www.pizol.com.